

**NAŠA
STRANKA**

Politička organizacija građana „Naša stranka“
Općinski odbor Velika Kladuša
Adresa: Huske Miljkovića 2
Telefon: 060 311 6674
E-mail: info@kladusajenasa.org

Bosna i Hercegovina
Federacija Bosne i Hercegovine
Unsko-sanski kanton
Općina Velika Kladuša
Općinsko vijeće Velika Kladuša
n/r predsjedavajući, Admil Mulalić

U skladu sa članom 98. Poslovnika Općinskog vijeća Općine Velika Kladuša, upućujem u proceduru sljedeći **Prijedlog Odluke o izmjenama i dopunama Odluke o plaćama i naknadama izabranih zvaničnika, nosioca izvršne funkcije i savjetnika profesionalno angažovanih u Jedinstvenom općinskom organu uprave Općine Velika Kladuša:**

Na osnovu člana člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06), člana 62. Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj: 45/10, 111/12 i 20/17), člana 47. Zakona o plaćama i naknadama u organima vlasti Unsko-sanskog kantona („Službeni glasnik Unsko-sanskog kantona“, broj: 11/15) i člana 32. Statuta Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće Općine Velika Kladuša na ____ sjednici, održanoj _____ godine, donijelo je:

O D L U K U

o izmjenama i dopunama Odluke o plaćama i naknadama izabranih zvaničnika, nosioca izvršne funkcije i savjetnika profesionalno angažovanih u Jedinstvenom općinskom organu uprave Općine Velika Kladuša

Član 1.

Član 10. Odluke o plaćama i naknadama izabranih zvaničnika, nosioca izvršne funkcije i savjetnika profesionalno angažovanih u Jedinstvenom općinskom organu uprave Općine

Velika Kladuša (Službeni glasnik Općine Velika Kladuša, broj: 5/13) se briše. Dosadašnji član 11. postaje članom 10. i tako redom.

Član 2.

Ova Odluka stupa na snagu danom objavljivanja u „Službenom glasniku Općine Velika Kladuša“.

Obrazloženje

Pravni osnov za donošenje izmjena ove Odluke je član 62. stav 2. Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj: 45/10, 111/12 i 20/17) koji propisuje da visinu i način ostvarivanja prava na naknade i dodatke na plaću za kantone utvrđuje vlada kantona, a za općinu i grad općinsko, odnosno gradsko vijeće, te član 47. stav 1. Zakona o plaćama i naknadama u organima vlasti Unsko-sanskog kantona („Službeni glasnik Unsko-sanskog kantona“, broj: 11/15) kojim je definisano da se prava na naknade i dodatke na plaću utvrđene ovim zakonom odnose i na uposlene u gradskim, odnosno općinskim organima vlasti.

Važećom Odlukom o plaćama i naknadama izabranih zvaničnika, nosioca izvršne funkcije i savjetnika profesionalno angažovanih u Jedinostvenom općinskom organu uprave Općine Velika Kladuša, koju je Općinsko vijeće Općine Velika Kladuša usvojilo na sjednici održanoj 20.06.2013. godine, u članu 10. definisano je pravo Općinskog načelnika, Predsjedavajućeg Općinskog vijeća i savjetnika Općinskog načelnika na primanje naknade/plaće i nakon prestanka javne funkcije, i to na sljedeći način:

Član 10. (Naknada plaće nakon prestanka javne funkcije)

Općinski načelnik i Predsjedavajući Općinskog vijeća nakon prestanka obavljanja javne funkcije, a do zasnivanja novog radnog ili ugovornog odnosa ili do ispunjavanja uvjeta za penziju, prema općim propisima, imaju pravo na naknadu plaće koju su ostvarivali dok su obavljali javnu funkciju u trajanju od 12 mjeseci. Nakon prestanka dužnosti načelnika odnosno predsjedavajućeg Općinskog vijeća, a do početka ostvarivanja plaće po drugom osnovu ili do ispunjavanja uvjeta za penziju, isti imaju pravo na: - sa radnim stažom do pet godina, tri mjeseca na naknadu plaće koju su ostvarivali dok su bili na javnoj dužnosti, a sljedećih devet mjeseci 50% od te plaće; - sa radnim stažom od pet do 15 godina, šest mjeseci naknadu plaće koju su ostvarivali dok su bili na javnoj dužnosti, a sljedećih šest mjeseci 50% od te plaće; - sa radnim stažom od 15 do 25 godina, devet mjeseci naknadu plaće koju su ostvarivali dok su bili na javnoj dužnosti, a sljedeća tri mjeseca 50% od te plaće; - sa radnim stažom preko 25 godina, 12 mjeseci naknadu plaće koju su ostvarivali dok su bili na javnoj dužnosti. Prava iz stava 1. ovog člana u punom iznosu imaju i savjetnici u trajanju od 6 mjeseci, ukoliko su dužnost savjetnika obavljali dulje od dvije godine. Izabrani dužnosnici koji

se, u skladu sa zakonom, vrate na isto ili slično radno mjesto sa kojeg su izabrani, odnosno imenovani na javnu funkciju, nemaju pravo na naknadu plaće iz stava 1. ovog člana.

Ukidanje naknade definisane ovim članom, u javnosti poznate kao „bijeli kruh“, bio je jedan od najvažnijih zahtjeva građana na protestima u februaru 2014. širom BiH, nakon čega je ova privilegija i ukinuta u mnogim državnim institucijama, pa tako i u institucijama Unsko-sanskog kantona, te u nizu općina/gradova u BiH. Upravo na tragu toga je Skupština Unsko-sanskog kantona, na sjednici održanoj dana 09.10.2015. godine, donijela je izmjene Zakona o plaćama i naknadama u organima vlasti Unsko-sanskog kantona kojima je iz sadržaja Zakona izbrisan član koji je definisao pravo izabranih zvaničnika, nosioca izvršne funkcije i njihovih savjetnika, na naknadu plaće nakon prestanka obavljanja javne funkcije.

Uzevši u obzir to da izabrani dužnosnici funkcije obavljaju profesionalno, s važećim ugovorom u radu, te shodno tome nakon prestanka javne funkcije imaju pravo na naknadu za nezaposlene koju Zavod za zapošljavanje isplaćuje nezaposlenim licima čiji je prethodni radni odnos trajao minimalno osam mjeseci, brisanjem spornog člana pomenute Odluke ne bi bilo narušeno njihovo pravo na „zaštitu od nezaposlenosti“, odnosno da ovom izmjenom izabrani dužnosnici bi bili u tom pogledu izjednačeni sa svim građanima i radnicima u Velikoj Kladuši, odnosno Bosni i Hercegovini.

Podsjećamo da je Odluku o ukidanju „bijelog kruha“ vijeće donijelo u 2020. godini, no taj akt nikad nije objavljen u Službenom glasniku Općine zbog čega se ne može primjenjivati.

U vremenu kada je ekonomska situacija jako teška što se odražava i na planirane prihode budžeta Općine, postojanje ove privilegije izabranih dužnosnika je najočitiji primjer prekomjerne i neopravdane potrošnje općinske javne uprave/administacije.

Stoga, od vijećnika u Općinskom vijeću Općine Velika Kladuša zahtijevamo da izmjenama i dopunama Odluke o plaćama i naknadama izabranih zvaničnika, nosioca izvršne funkcije i savjetnika profesionalno angažovanih u Jedinostvenom općinskom organu uprave Općine Velika Kladuša konačno ukinemo naknadu plaće nakon prestanka javne funkcije, odnosno da ukinemo pravo na „bijeli kruh“.

Predlagač:
Amir Purić, klub vijećnika Naše stranke

Obrađivač:
Služba za opću upravu i društvene djelatnosti